


0 10 20 30 40 50 60 70 80 90 100 110 120 130 140 150 160 170

Inches  
Centimetres  
1 2 3 4 5 6 7 8 9 10 11 12  
1 2 3 4 5 6 7 8 9 10 11 12



10685.0245  
K88  
4

坤甯宮喫神肉五月初一日蒙

賞荷包七件予繼室蕭夫人體素壯無疾病自癸丑

內兄沛之貿易歇業予二十餘年廉俸所餘交

沛之存放盡爲烏有沛之因大局破壞至此並

非有意消耗予以至戚未便怨言而蕭夫人頗

難爲情於是鬱結煩悶至不可解氣聚血滯轉

成腹脹之症形容日見枯瘦眠食不能如常徧

延時下名醫調理先似有效久卽不應年前病

勢已沈至今歲春夏尤形危殆百藥罔效遽於

閏五月二十一日子時去世嗚呼哀哉蕭夫人莊重和平善持家待諸妾寬而得體御婢僕有恩死之日合家哀泣稱頌弗忘夫人於癸巳年歸予時予已任御史次年得科道得學差家道漸裕非如予元配史夫人之命苦而夫人勤儉守約從不妄製衣飾蓋其自甘簡淡素性使然至於待人從不刻薄予爲本家兄弟外甥捐官及賙濟親友故舊門生捐助粥飯廠棉衣會一切善舉皆極力懇懇務從豐厚略無婦女吝嗇

之見其治家內外分別規矩甚嚴日用繁碎之事皆照應周到井井有條可謂內助得人唯夫人生三女其幼者早夭頗望生子而竟未得至歿時兩女皆未字人以此爲憾夫人在浙時介蕃六弟適因差到浙夫人聞所生長子廷琛襁褓失母恐乏人愛育與六弟言爲子繼子望其早來撫養未遂所願心常悒悒臨危謂子曰繼子不肯令之早至今已長成聞荒廢已久卽來京恐不可教矣其言果驗夫人少予十一歲且

體素健予日見衰老方倚之爲久後持家之靠  
乃先我而去予復何望哉先於四月初四日老  
妾陳氏以時疾歿夫人已不能下牀猶聞而哭  
之恨不得撫棺一慟自知將不起謂予曰君今  
年運氣何不佳恐不第此一事也夫人去世後  
兩女哭之徹旦不休予顧之淚亦潸潸不能止  
於是請假十五日六月初四五兩日開奠二十  
三日出殯停龍泉寺東院是時予奉  
旨偕周芝臺大司馬祖培許溟生大司空乃普王子

槐少司馬茂蔭宋雪帆閣學晉在外城辦理團  
練芝翁與予各捐京鈔一萬串充公費初十日  
萬壽聖節呈遞如意一柄在

圓明園

正大光明殿行慶賀禮

恩賞至

同樂園聽劇前後三日每日卯正一刻入座

上御正面樓下

召見軍機大臣親郡王貝勒貝子以下一品大員皆

得與坐東西各四五人坐一閒至午正三刻傳  
旨令散始各退出入座後

賞御饌克食瓜果各物退於東西院用早飯皆內務

府膳房預備第三日

賞親郡王以下各大臣物件光蒙

賞如意一柄緙絲蟒袍料一件帽緯一匣洋鼻煙一

瓶玉玩意香爐一座磁果盤二磁花瓶一太監

搭出隨在座叩首謝乃散

同樂園戲臺三層院搭席篷高出樓表戲具衣飾

多平金顧繡鼓樂皆在臺後臺面極寬敞賜福  
等戲皆自上一層樓繞中層而下鈞天廣樂非  
人間所得有也演戲中間

上命太監抱

皇太子大阿哥至東西親郡王以下各大臣前看

視光隨班跪請

安各座到畢回至

御座前

天顏有喜侍從臚歎真所謂君臣同樂也十月朔日

蒙

派進

坤甯宮喫神肉年終呈進如意蒙

恩賞福字荷包如例

八年戊午 年六十二歲

元旦在

太和殿前隨班行慶賀禮十六日

上御圓明園正大光明殿

賜宴廷臣光隨班與宴聽戲一切禮節如前光蒙

賞玉如意一柄顧繡蟒袍料二襲帽緯一匣洋鼻煙

一瓶玉玩意酒杯一磁果盤二磁花瓶二共七

件二月初一日

上御經筵隨班行禮跪聽

御論入

文淵閣領

賜宴五月節蒙

賞荷包七件六月初十日

萬壽聖節

恩賞在

同樂園聽戲三日光隨班進

園聽戲

恩賜玉如意蟒袍玉玩意帽緯鼻煙磁果盤磁茶確

各物七件八月奉

派偕文彩許乃普春祐查佑萬年吉地工程九月十

五日奉

派閱順天鄉試覆試卷因科場案發十月廿四日奉

派覆勘順天鄉試卷在

圓明園九卿朝房公開并

令派審此案之怡鄭二王全小汀大司馬慶陳子鶴

大司馬孚恩監試覆勘三日乃畢此次科場之

案未令刑部會審予深以為幸焉年終呈進如

意蒙

恩賞福字荷包如例

九年己未 年六十三歲

元旦恭詣

太和殿行慶賀禮十六日

圓明園正大光明殿

賜宴廷臣光隨班入宴謝

恩行禮蒙

恩賞玉如意一柄絳色摹本龍緞袍料一卷帽緯一

匣鼻煙一瓶玉筆洗一件磁果盤花瓶三件二

月初一日

上御經筵隨班行禮聽講跪聆

御論入

文淵閣領茶宴初二日蒙

派進

坤甯宮喫神肉又奉

派偕吏部侍郎文鑑湖清承修

景陵工程十三日跪

安是日適值

欽派王大臣奏科場案已革協辦大學士戶部尙書

柏葭擬斬決編修浦安主事李鶴齡羅鴻繹皆

斬決

上御勤政殿



召見惠親王以下諸王大臣跪聆

聖諭訖光跪

安退奉

派戶部尙書肅順與光監視行刑

命肅順先往光候

諭旨下午正三刻捧

旨赴西市宣讀後行刑各獻首級目不忍觀時申初

二刻偕肅順回

園覆

命日已暮宮門尙未閉以待覆奏摺呈遞進

丙奉

旨知道了欽此乃由

園進城己亥刻矣十六日啟程赴

東陵十八日開工後卽行十九日經三河先塋拜叩廿

一日旋京次日覆

命蒙

召見

上詢萬年吉地風水光謹奏對局勢甚美未敢多言

緣去年曾奉

派查估萬年吉地工程此次就近前往瞻仰龍穴沙  
水實亦未得其詳三月初六日奉

旨會試正考官

派大學士賈筠堂楨副考官

派光與戶部左侍郎沈朗亭兆霖工部右侍郎成偉

卿琦得

旨卽刻入闈下晚拜內監試御史忻澶侯雲登內收

掌傳馴程鼎芬同考官王錫振王凱泰陸秉樞

張之萬林壽圖章鑿岳世仁董元醇程祖誥羅

嘉福李銘皖恩吉張洵孫如僅志和杜聯蕭培

元孫楫監試收掌同考官亦來拜初七日早掣

十八房房分籤初八日早傳鼓禮部堂官送

欽命題至知貢舉文祥梁瀚送進光偕筠堂相國沈

成二君跪接捧入啟封請監試暨同考官張章

孫三殿撰並張太史寫題付刻

欽命四書首題色難有事次題今夫天三題焉能使

予不遇哉詩題賦得高車高榭得從字半夜刻

印題紙畢傳鼓送出十一日公擬二場五經題  
四人分寫付刊半夜刊印畢傳出十二日公擬  
三場策題五道請同考官五人分寫畢即刊  
印存正考官房十四日半夜傳出初十日恭請  
聖安進首場題紙並繳

硃筆十三日進呈二場經題紙十六日早進呈三場  
策題紙是日午閒刻

欽命宗室四書題詩題次早傳出十九日恭繳宗室  
題

硃筆一併進呈題紙至公堂自十一日進會試頭場  
文卷每日分起傳進由內監試同總裁正副考  
官公同籤分各房印十八房截記十八日分閱  
宗室試卷十九日取定廿一日進呈二名傳送  
至公堂呈遞廿二日至公堂進三場試卷畢考  
官及同考官均不上堂各歸本房閱看各房考  
官薦卷亦俱畢有發刻文卷彌封交本房鈔出  
酌改付刊本年會試因去歲順天秋闈科場案  
發嚴懲積弊此次正場試卷均在堂上公閱每

日清晨上堂內監試將各房卷箱揭去封條取卷交各房官分閱呈薦至晚仍封鎖箱內置堂上交內收掌官監管不許取卷回房至廿二日退堂後三場卷已薦畢始將各箱落卷交本房二三場有出色卷亦準補薦實屬弊絕風清爲從來所未有惟首場頭題題境太窄佳文較少廿九日請考官寫十本名次批語第一名本定蔡琳卷因詩不知題目出處抑置第二以原擬第二名馬傳煦卷居首因其詩較妥也四月初

一日進呈十本第一二六九十五本皆予手取進舌十本摺奉

硃批所取卷均妥名次亦無移動初五日填草榜請內監試及考官四人寫各卷面名次後分交各房寫各卷批語加圈并詳磨勘有不合式卷卽撤去按房分補取初十日揭曉初九日黎明開門知貢舉官禮部鈐印堂官并外簾提調監試各官俱進辰刻填榜從第六名起至一百九十一名畢用晚飯掌燈後填前五名倒從第五

至第一填畢知貢舉用硃筆標榜禮部鈐印堂  
官看視蓋用禮部堂印稍歇至二鼓後送出各  
散天明後考官等各回家十一日赴

園覆

命蒙

召見四人詢問此次場規文卷各情形皆一一奏對  
訖退出予以填榜日未得眠歸宅後覺頭暈勉  
強覆

命幸未隕越當於將退時陳明頭暈下情乞

賞假數日

上點首次日具摺請假奉

旨賞假十日至廿三日銷假請

安五初一日具奏查估萬年吉地工程初二日蒙

賞荷包七件廿七日奉

派教習本科庶吉士次日具摺謝

恩俟滿教習全小汀大司馬督辦海運回至六月廿

五日始同至翰林院到任授書七月初二日同

至庶常館開課小教習八人亦至由小汀與予

飭館中官人備席亦向例也予以庚辰選館至  
 已未恰四十年迴憶昔時授書旅進共九十餘  
 人惟予與同里羅雅林士菁年最少今同年同  
 館僅許瀛生大冢宰一人而予亦皓然白首日  
 就頽衰因感歎率成七律二首紀事并示諸庶  
 常予以本科考官教習本科庶常亦可謂翰墨  
 緣深惜予齒衰學退未能誘掖庶常諸門人因  
 念昔日館選後旋瀛晉謁府試案師景福泉先  
 生先生喜見顏色謂曰子果入詞林足見前童

試時吾賞識不虛他日前程尙當遠大應保名  
 保身保心終身守此三保勿負吾言光悚立敬  
 聽謹懍弗忘數十年來頗得斯益爰將三保之  
 訓數語勉勸諸庶常門生以為師門淵源一脈  
 耳十月初一日奉

派進

坤甯宮喫神內年終呈進如意蒙

賞福字荷包如例

十年庚申 年六十四歲

元旦至

太和殿行慶賀禮是時大風午刻

上御太和殿筵宴親郡王以下大臣暨外藩蒙古王  
貝勒等奏樂并滿蒙各樂舞雜技蓋十年一次  
盛典也光隨班入宴未刻散十八日

上御圓明園正大光明殿筵宴親郡王以下大臣暨  
外藩蒙古王貝勒等亦奏樂并滿蒙各樂舞雜  
技光隨班入宴午刻散二月初一日蒙

派進

坤甯宮喫神肉初二日

上御文華殿經筵光奉

派直講書經無稽之言勿聽弗詢之謀勿庸二句一

切禮節如前四書直講爲賈筠堂相國二十六

日奉

派覆試各直省鄉試舉人閱卷大臣四月十五日奉

派覆試新貢士閱卷大臣十八日帶領己未庶常散

館在

出入賢良門外橋南行禮廿五日在

出入賢良門外傳臚光隨班行禮侍班時

聖躬欠安故未進城回宮升殿也五月初一日蒙

賞荷包七件六月初十日

萬壽聖節呈進如意蒙

賞進同樂園聽戲四日一切戲具行頭新添增製并

傳外城各戲班腳色伺候熱鬧非常尤近年所

未有也予以炎暑憚於每日奔走因住

園寓刑部下處一畝園公所三日末一日蒙

恩賞天青絳色大裁二則龍江綢袍桂料一套帽緯

一匣鼻煙一瓶荷包二對玉碗一磁果盤二茶

確一共七件七月杪英法二國兵船到天津僧

邸守大沽礮臺甚嚴乃由白潭河上岸攻陷大

沽礮臺警報頻聞僧邸兵退瑞澄泉相國麟兵

勇潰散於是

上有北狩熱河之議皆怡鄭肅三人懇懇定議也其

時桂燕山相國已在天津議和一切和約條規

皆照準矣惟親遞國書一節

上未允命怡王偕穆蔭赴通州再議英國遣巴嘎哩



來往議未決忽於八月初四日口語決裂將巴  
酋及伊手下人誑拏解京鎖鑰交刑部監禁共  
十八人又陸續拏獲英法二國文武兵將三十  
餘人遞至

園寓續分寄昌平密雲各州縣挖斃者數人於是  
英法二國進兵至通州僧邸兵又退瑞相兵竟  
潰散無一人勝保帶兵在八里橋接仗槍礮及  
所騎馬鞍馬立倒斃勝保落馬兵勇擁護入城  
英法二國兵直赴齊化門八月初一日

上硃諭欲赴熱河交在

園王大臣閱看會議大半皆阻留以爲不可聞亦  
有從怡鄭肅三人議者次日京中大學士以下  
各大臣公同具摺陳奏以爲必不可行予在賈  
筠堂相國宅與議又與梁海樓侍郎瀚商同具  
摺聯銜於初二日奏請

聖駕進城奉

旨留中而

園中預備啟鑾已調派兵衛安排車馬

上猶恐人心渙散奉

旨安慰臣民以為決無北狩之意然都城內外喧傳

殆徧已有攜家出京逃避者矣至初七日天明

警報愈急

上於巳刻由

園起程徑赴熱河奉

旨留恭親王及桂燕山相國駐園

命豫親王及周芝臺相國在

禁城留守

命賈筠堂周芝臺兩相國陳子鶴大司馬及光四人

在外城防守

命瑞芝生大司寇全小汀大冢宰麟梅谷少司寇寶

佩蘅少司農文百川少司農諸人在

內城防守先於七月

命周芝台相國陳子鶴大司馬潘星齋少司空宋雪

帆少宗伯辦理外城團防偕五城巡城御史在

浙紹鄉祠督同司坊官并約京卿科道翰林籌

議團防事宜賈周陳三公偕予議以騾馬市中

州館爲外城辦事公局各派戶兵刑三部司員  
隨同辦理自

聖駕啟行內城九門戒嚴惟正陽崇文二門辰起申  
命閉外城七門惟彰儀西便二門亦辰啟申閉內  
外城又經巡防大臣分派滿漢侍郎閣學京卿  
科道翰林守各城惟內外旗綠各營兵均不堪  
用各門亦無礮位器械於是訛言謂英法將進  
攻城初八日以後內外城官紳商民無論滿漢  
紛紛逃避或隻身獨行或結伴攜眷同走或赴

西北一帶山中潛匿或赴西南保定一帶大路  
奔逃大車小輛蟻附前行內外城車輛驟馬俱  
需重價雇賃嗣竟無可雇覓卽重價亦無從得  
者內外城鋪家關門在家閉戶日色慘淡煙霧  
迷湧直不成世界內城明火搶劫肆行無忌外  
城土匪蠶起勢將聚眾搶掠賈周陳三公與予  
公商此時外患固可慮而內患尤可虞必須先  
募練勇分頭巡緝以安閭閻否則寇盜紛乘不  
能自固矣於是設東西兩勇局東局在虎坊橋

北梁家園義塾爲公所西局在菜市口揚州館  
西閒壁官宅爲公所兩局共招集勇丁五百名  
皆鋪家住戶保結投充分設日勇武弁武舉逐  
日操練又以帶勇司員統率晝夜防範巡查外  
城各街巷胡同添製刀械長桿各取手槍台槍  
火礮火繩每日勇糧每名京錢一千文計每月  
勇糧公費約須銀三千兩予與周芝台相國各  
先捐銀一千兩賈筠堂相國捐銀五百兩陳子  
鶴大司馬捐銀三百兩又彭詠莪相國朱檄堂

大宗伯張詩船大司空各捐銀三百兩其餘卿  
貳京堂諸人有願捐者量力捐助繼以捐資未  
能經久乃奏請每月由戶部發給勇糧銀三千  
兩按月支領奉

旨允行外城得兩局勇丁日夜巡查土匪乃不敢作  
亂閒有竊盜亦卽隨時查拏嚴辦至今人民安  
堵職此之由自初五日怡王將英酋巴嘎哩誑  
拏奏交刑部鎖鑰收禁并該酋手下十餘人亦  
皆鎖禁南北兩監初六日子偕瑞芝生靈香生

同至南北所查看蓋以外國人收禁爲

本朝從來未有之事也巴酋向予與芝生香生言  
各位大人容我一言否予曰爾何言巴酋云我  
本奉我國將令來議和大局未定何以遽將我  
旨誑拏鎖鑰收禁我有何罪是何道理芝生云爾  
罪惡貫盈天道不容香生云爾害我中國其罪  
甚大尙復何說巴酋怒言若論天道我之生死  
自有天命若天命不該死恐中國亦不能令我  
死也伊曉曉舌辯予因向巴酋云爾昨日係

欽命王大臣怡王等將爾拏至奉

旨收禁我三人乃刑部堂官前來閱視並非承審研  
訊爾無須多言但靜以俟之亦決不令官人凌  
虐汝惟刑具乃奉

旨鎖禁未敢開釋因約芝生香生至他所閱視飭提  
牢司獄各官令官役禁卒小心防守不可凌虐  
爲要予謂香生云英法非比朝鮮等屬國該酋  
卽有罪犯不得謂之叛逆我輩非承審之員自  
不必向其多言也南北所查畢各散是時頗有

人向予言巴酋爲英國謀臣不如乘此時奏請  
誅之以絕後患予謂巴酋來議和本不應誣拏  
鎖禁伊旣爲彼國謀臣焉肯棄而不問儻將該  
酋正法彼國來索何以應之如直攻城索取彼  
之槍礮火器精利此時我之兵勇業已潰散又  
將何以守禦萬一都城被彼攻陷則

宗社宮殿尙可保乎百萬生靈亦不可問矣予觀大局  
非和不可而議和仍捨此人不可姑靜以聽之  
未可置目前大禍不顧而計及將來之後患也

其人唯唯而去心或以爲不然不知予言竟驗  
也初六日提牢滿漢司官來稟巴酋不食意欲  
求死予謂此人關繫綦重爾等須再三婉言勸  
慰待以好飲食不可以常犯視之伊若肯食不  
妨以魚肉雞羊等物待之若無費卽傳予言令  
飯銀處先提銀五十兩交爾開銷可也至次日  
提牢來言如予所囑向其開導伊已飲食如常  
是日忽傳言

上已啟行北狩京都人心渙散英國兵已抵通州八

里橋之西勝帥敗退進城各門戒嚴兩監人犯六百餘名終日喧鬧十二日武備院卿恆子久祺奉恭王諭劄到刑部進監看視時英國來文索取巴酋甚急恐其進兵攻城欲令巴酋作字止其帶兵統目謂將議和不可進攻該酋不應且云我現在何所身披刑具辱莫大焉尙能作書止兵耶子久以此回復恭邸於是復奉來劄子久再進監將伊提出大牢另住一屋釋其刑具婉言開諭再三該酋乃親筆作彼國書付子

久攜呈恭邸令人送僧王大營遣弁賫投十八日奉恭邸劄仍令子久進監將巴酋及其手下人十餘名皆提禁備車送至德勝門內高廟安置日以酒果魚羊各物款待之該酋臨出監向提牢摘帽申謝不已自巴酋收禁後兩監人犯皆喧言英國必來攻城刑部恐必被毀日夜不安於是具奏調取正藍旗兵五百名分置監內署外周圍防範署中滿漢司員寥寥至初七日後絕無人赴署者子每日到署目覩情形添派

趙三惟公年譜  
滿漢得力司員廿四人分兩班同檔房各員在署值宿照料至十八日各監犯見巴酋出監復聞謠言謂將攻城先毀刑部以圖報復於是六百餘人洶洶肆鬧環跪於提牢司獄各官前乞求懇稟各堂釋放出獄並直言我等坐監原係守法但守法而死於法亦此心所甘受若死於寇而爲外國礮火斃命情實難甘如肯施恩釋放我等俟事平之後再入監守法否則我等拚此一死今日必然出獄不能守法矣情詞直決

各官再三開導不行予進署各官面稟如是予思各監犯所言未嘗無理況城內外官民紛紛逃避監犯豈肯坐而待死惟其中各犯情罪不一如秋審重犯及已擬死罪并軍流遣犯難以開釋如身審原被告及罪該杖徒或尙未擬定罪名各犯似可暫時分別交旗交地方州縣五城司坊取保釋放事平按名傳提再行收禁未嘗不可如果將現審三四百人釋放其餘不過二百餘人兩監分禁每所不過一二十人卽易



約束因商之瑞芝生諸同堂皆不甚以爲然予  
言今日事急矣不能計慮將來卽奏陳後

上或不允必須再奏况

皇上聖明我輩措子據實直陳詳言迫切情形宜必

邀

準若諸公不肯聯銜予一人單銜具奏可也諸同人

遂無異詞予急命各司分別情罪除秋審死罪  
等項人犯無庸議外其餘現審人犯全行請暫  
釋放於十九日具奏熱河報回奉

旨依議欽此於是開發三百餘人出禁皆欣然而去  
及十月兵退事平按名傳提再行收禁居然無  
不到者此事予當時亦放膽而行恐致反獄不  
成事體乃後來平復無事實亦初願所不到也

右

先文恪公自訂年譜一卷起嘉慶丁巳訖咸豐庚申凡六十四年又五年而

先公薨於位是為同治乙丑二月十九日即以其年冬十一月安葬三河縣祖塋自庚申而後

先公凡兼署吏部 者 管 者

先二姊於辛酉二月適桐城光稷甫儀部熙以乙丑二月初九日病歿

先公往視悲不自勝歸而病遂以不起廷瓚時方七齡嘗無知識先一年隨

本生考介蕃府君京至師爲

先公嗣依膝下甫半載而遽丁大故故於此五年中事得諸聞見約略僅此而已

先公生平詩文卷軸皆度京寓之蘭雪齋喪次大半散佚比檢視惟贖此譜及殘稿百餘番今編輯遺集並寫定此譜復恭錄

恩卹論旨

諭祭文碑文

國史本傳冠諸卷端付之梓人工旣竣爰述顛末俾後之子姓有所考焉

光緒十有六年庚寅季冬男廷瓚謹識



趙文恪公年譜

卷三

光緒十六年六月庚寅奉命

未幾之平

國史本朝臣等謹將

命祭文



